

Weh Wi Ga Fi Seh

Kip sayf fahn di vairos!
Kip op yu helt.

Harikayn Seezn 2021 Soon Don: Foa Moa Dayz fi 2021!

Bak wen mee mi-di groa op, harikayn seezn doz deh fahn Joon tu Aktoaba. Wel, dat don chaynj fahn wahn wail bak now. Mee noh noa if da oanli sayka klaimit chaynj, bot ih mosi hafu ga lat fi du wid klaimit chaynj. Tudeh day, harikayn seezn da fahn Joon tu Novemba. Laas yaa, Ah mi shyaa wahn lee raim mi ma mi tel mi fi shee konchri pipl da Bileez doz laik seh. Dehn mi oanli ga di raim di goh op tu Aktoaba eena dehndeh dayz. Soh mee ad een di Novemba paat eena dis raim:

Joon, too soon
Joolai, stan bai
Aagas, kohn yu mos
Septemba, rimemba
Aktoaba, stay soaba
Novemba, aal oava

Memba now, Novemba di rifa tu **aal a Novemba, op tu Novemba 30**. Soh, if yu di reed dis pahn Friadeh Novemba 26, 2021, stil chek weda ripoat mek shoar notn di bobl ahn bail op eena di Atlantik. Wid disya kalamit chanyj di chyanj op evrting wi yoostu noa bowt weda, maybi harikayn seezn maita jos chrai kleep intu lee bit a Disemba!
